

mit künne bey mir ermessen das er still sey gestanden / vom sech-  
sten tag seiner erste erscheinung / bis auff den 15. tag / da er schier  
gleich in einer Lini mit den hindern zwayen redern des grossen  
wagens gestanden ist / vnd dem gesicht nach / mitten im löwen  
gestandē nach seiner leng vñ nach der prait bis in dy 20. grad  
vom thier kraiß gehabt.

Hab im also fleissiglich nach gedacht vñnd gerechnet auff  
den sechsten tag / vñ auff die zeyt / wie mir der man anzaigt hat  
vnd gefunden / wo er im Löwen am ersten wer erschinē / mit di-  
ser ob angezaigter prait / vnd zu der stund / wie oben angezaigt  
am sechsten tag Augusti / het man den Cometen in landen / ge-  
gen mitternacht auch ee gesehen / das ich doch von kainem nye  
erfarn hab künnen noch mögen / welch von mitternacht künne  
sein oder auß irñ schreyben / Sonder all anzaigt / man hab yhn  
nür umb vnser frauen tag vnd darnach gesehen vnd nit dar-  
vor / Das er aber zu morgēs am ersten erschinē muß sein / gibet  
ein anzaigen dy finsternus der Sonnen / die ein vrsach ist dises  
Cometen / dan sy auch im auffgang geschehen ist.

Dy weyl er aber zwischen aym vnd zwayen vhren ob dem  
Drizonten hoch gesehen ist worden / muß er ee auff gangē sein /  
nemlich auff das kürzest umb ain vhr / zu der selbigen stund /  
sind auff gangen dy hewpter der zwilling Mercuri vñ Martis  
natur / muß von nöten folgen / nach anzaigen vnd gelegenheit  
des Mars der in am ersten gesehen hat / das diser Comet nit  
weyt von den selbigen stern steen hat müssen am sechsten Au-  
gusti / dan wo er weyt vom thier kraiß gestanden wer / heten in  
die da wonē gegen mitternacht / aber ee sehen mögen / dan wir /  
das ich bey kainem hab erfragen mügen.

Darumb diser Comet / auß ob angezaigten vrsachen / muß  
am ersten erschin sein nach dem obersten himel / mitten in freb-  
sen / Nach dem himel aber der westen stern / nit ferr vō der pild-  
nus der zwilling / nahent bey den hawpten / vnd ist dz auch ein  
güt anzaigen / das der vierdt schein der Sonnen finsternus in